

修訂日期: 2006/12/01 發行日期: 2007/3/7

發行單位: 中華電子佛典協會 (CBETA) <http://www.cbeta.org>

資料底本: 大正新脩大正藏經 Vol. 08, No. 258

原始資料: 維習安大德提供之高麗藏 CD 經文, CBETA 自行掃瞄辨識, CTPP 提供新式標點, 其他

No. 258

佛說聖佛母小字般若波羅蜜多經

西天中印度惹爛馱羅國密林寺三藏賜紫沙門臣天息災奉 詔譯

如是我聞：

一時，世尊在王舍城鷲峯山中，與大比丘眾千二百五十人俱，并諸百千俱胝那庾多菩薩，復有百千俱胝那庾多梵王帝釋護世，諸大眾等，恭敬圍遶。

爾時，世尊於吉祥寶藏師子座上結跏趺坐。是時聖觀自在菩薩摩訶薩即從座起，偏袒右肩，右膝著地，瞻仰尊頭目不暫捨，合掌恭敬，歡喜踊躍，頭面禮足而白佛言：「世尊！唯願世尊為我說是小字般若波羅蜜多經。令諸眾生得聞是法，獲大福德，一切業障決定消除，當來速獲無上菩提。若有眾生發至誠心，受持讀誦此真言者，隨所求願，決定成就，無諸魔難。」

爾時，世尊告聖觀自在菩薩摩訶薩：「善哉，善說是言。善哉，善哉！善男子！汝能如是至心為諸眾生，令得安樂長壽。善男子！汝應諦聽，至心聽我說是小字般若波羅蜜多經。若諸眾生聞說是法，獲大福德，一切業障皆悉消除，決定速證無上正等菩提。若有眾生發心受持此真言者，無諸魔事，皆得成就。」

是時，聖觀自在菩薩摩訶薩復白佛言：「世尊！善逝今說，為諸眾生令得安樂。」

爾時，世尊而於一時入三摩地，名解脫一切眾生。從定起已，眉間毫相放百千俱胝那庾多光明。此大光明普照一切諸佛刹土，所有無量眾生蒙光照曜，皆得決定速證阿耨多羅三藐三菩提；所有地獄一切眾生皆獲安樂；諸佛刹土六種震動，於諸佛上又雨上妙栴檀、沈水、細糝之香，以用供養。

爾時，世尊說此般若波羅蜜多經。是時，所有一切菩薩摩訶薩，各各發起平等之心，發起慈愍心，發起憶念利他心，發起遠離一切罪障心，發起種種利益之心，發起般若波羅蜜多心。是時，世尊告聖觀自在菩薩摩訶薩：「汝等諦聽，我今為汝說是聖佛母小字般若波羅蜜多真言曰：

「曩莫(入)(一) 舍(引)吉也(二合、反)(二) 母曩曳(引)(三) 怛他(去、引)誡哆(引)野(引)(四) [口*栗]喝(二合)帝(引)(五) 三麼藥(二合、反)訖三(二合)沒馱(引)野(六) 怛儻也(二合、反)他(引)(八) 母[寧*頁](引)母[寧*頁](引)(九) 摩賀(引)母曩曳(引)(十) 娑嚩(二合、引)賀(引)(十一)」

佛告聖觀自在菩薩摩訶薩言：「此聖佛母小字般若波羅蜜多真言，一切諸佛由是得阿耨多羅三藐三菩提，我亦由是小字般若波羅蜜多真言故得成無上正等菩提。往昔有佛亦名釋迦牟尼如來，於彼佛所聞說是法，彼佛說言：『如是三世一切諸佛，由斯法故方得成佛。』」

佛復告聖觀自在菩薩摩訶薩言：「我今為汝授其記別。汝於人間未來世中得成佛道，號普放光明吉祥寶峯王如來應正等覺。汝得聽聞如是妙法，應當受持讀誦，若自書寫，若教人書，思惟解了，復能為他一切眾生廣說其義，令彼書寫是經，於己舍宅受持讀誦，於未來世速成無上正等菩提。是時一切如來同證汝等。我今為汝復說般若波羅蜜多陀羅尼曰：

「怛儺也(二合、反)他(引)(一) 唵(引)(二) 惹(仁左反，下同)野惹野(二) 鉢訥麼(二合、引)避(引)(三) 遏嚩(無可反)銘(引)(四) 薩囉(來假反，下同)薩哩拏(尼貞反，下同)(五) 尾哩尾哩(六) 尾囉(引)尾哩(七) 企哩企哩(八) 儺嚩哆(去)弩(鼻音)(九) 播(引)攞[寧*吉](寧吉反)(十) 沒度(引)哆(引)囉拏(十一) 布囉拏(十二) 布囉野(十三) 娑(去)誡嚩(武未反)帝(十四) 薩[口*栗]嚩(二合、引)[口*商](引)(十五) 麼麼(此處稱名)(十六) 布囉野(十七) 薩[口*栗]嚩(二合)薩怛嚩(二合、引)難(上)左(十八) 薩[口*栗]嚩(二合)揭[口*栗]麼(二合、引)(十九) 嚩囉拏(引)[寧*吉](二十) 尾戍(引)馱野(二十一) 尾戍(引)馱野(二十二) 沒馱(引)地瑟姪(二合、引)[寧*頁](引)曩(二十三) 娑嚩(二合、引)賀(引)(二十四)」

佛告聖觀自在菩薩摩訶薩：「此勝妙法般若波羅蜜多陀羅尼，是能出生一切諸佛菩薩之母。若有眾生暫聞是法，所作罪障悉皆消滅。此法，一切諸佛及眾菩薩，經百俱胝劫說其功德不能得盡。若能受持讀誦此陀羅尼者，便同入一切曼拏羅中，得受灌頂。又如受持一切真言，皆獲成就。」

是時，聖觀自在菩薩而白佛言：「世尊！何故復說此般若波羅蜜多陀羅尼？」

世尊告言：「我為愍念一切少善方便懈怠眾生，是故說此般若波羅蜜多陀羅尼。令彼受持讀誦，若自書寫，若教他書。此等一切眾生，速疾證得無上菩提。」

「如是，如是！世尊善說是般若波羅蜜多陀羅尼。」

是時，聖觀自在菩薩摩訶薩復白佛言：「世尊！此法實未曾有。世尊！此法實未曾有。善逝世尊大慈，為欲救度一切少善方便懈怠眾生，令得利益安樂，說斯妙法。」

是時，世尊說此經已，諸大聲聞并諸菩薩摩訶薩，一切世間天、人、阿蘇囉、彥達嚩等，聞佛所說，皆大歡喜，信受奉行，作禮而退。

佛說聖佛母小字般若波羅蜜多經